

20 MAY 2002

Mahathir-Berlepas/I

DR MAHATHIR BERLEPAS KE JEPUN DAN KOREA SELATAN

KUALA LUMPUR, 20 Mei (Bernama) -- Datuk Seri Dr Mahathir Mohamad berlepas ke Jepun hari ini untuk lawatan kerja dua hari sebelum meneruskan kunjungan ke Korea Selatan pada Rabu.

Perdana Menteri menaiki pesawat khas ke Tokyo dari Lapangan terbang Tentera Udara Diraja Malaysia di Subang dekat sini pada pukul 9 pagi.

Isteri Perdana Menteri Datin Seri Dr Siti Hasmah Mohd Ali dan beberapa menteri kabinet adalah antara orang kenamaan yang berada di lapangan terbang itu untuk mengucapkan selamat jalan.

Di Tokyo, Dr Mahathir akan menyampaikan ucap-tama pada Persidangan Antarabangsa Nikkei kelapan mengenai "China -- A Challenge or an Opportunity for Asean?".

Beliau juga dijadual bertemu Perdana Menteri Jepun Junichiro Koizumi, Menteri Kewangan Masajuro Shiokawa dan Menteri Ekonomi, Perdagangan dan Industri Takeo Hiranuma.

Dr Mahathir juga akan berada di Nagasaki untuk menghadiri majlis menamakan kapal Perbadanan Perkapalan Antarabangsa Malaysia (MISC). Kapal itu akan dinamakan Puteri Intan Satu.

Dr Mahathir kemudiannya akan melakukan lawatan rasmi dua hari ke Korea Selatan atas jemputan Presiden Kim Dae-Jung.

Selain meningkatkan hubungan dua hala antara kedua-dua negara, lawatan itu juga bertujuan merapatkan lagi hubungan dan persefahaman antara kedua-dua pemimpin.

Dr Mahathir juga akan berucap pada satu jamuan tengah hari anjuran empat persatuan perniagaan utama Korea Selatan dan melakukan tinjauan ke Pusat Penyelidikan dan Pembangunan Hyundai Motor, Pelaburan Kimia LG dan Pusat Inisiatif Penyelidikan Teknologi Satelit.

Perdana Menteri akan diiringi Menteri Luar Datuk Seri Syed Hamid Albar, Menteri Perdagangan Antarabangsa dan Industri Datuk Seri Rafidah Aziz dan Menteri Tenaga, Komunikasi dan Multimedia Datuk Amar Leo Moggie dan Menteri Besar Kedah Datuk Seri Syed Razak Syed Zain.

Ini merupakan lawatan ketiga Dr Mahathir ke Korea Selatan. Perdana Menteri sebelum ini melawat negara itu pada 1990.

-- BERNAMA

RZS MFJ RYN LAT